



Broj:01-7-50-1-45-5/07
Sarajevo, 28.12.2007. godine

Z A P I S N I K
sa 5. sjednice Komisije za pripremu izbora Vijeća ministara BiH

Sjednica je održana dana 28.12.2007. godine s početkom u 09,30 sati.

Sjednici su prisustvovali članovi Komisije: **Hadži Jovan Mitrović, Branko Dokić, Sefer Halilović, Mirko Okolić, Rifat Dolić, Jerko Ivanković Lijanović, Lazar Prodanović, Azra Alajbegović i Halid Genjac, Zlatko Lagumdžija, Velimir Jukić i Vinko Zorić.**

Pored članova Komisije, sjednici su prisustvovali: Maja Ribar ispred OHR-a i Kerim Zvizdić, novinar ONASA-e.

Sjednici je bio prisutan Milan Zjajić, koji je obavljao poslove sekretara Komisije i Đenita Pašić pripravnik u Sekretarijatu PS BiH.

Sjednica je završena u 12,00 sati.

Komisija je jednoglasno prihvatila sljedeći:

D N E V N I R E D :

1. Razmatranje podobnosti i davanje mišljenja – preporuke za potvrđivanje predsjedavajućeg Vijeća ministra BiH;
2. Tekuća pitanja.

Ad. 1. Razmatranje podobnosti i davanje mišljenja – preporuke za potvrđivanje predsjedavajućeg Vijeća ministra BiH;

Na samom početku ove tačke dnevnog reda, član Komisije Zlatko Lagumdžija je tražio da mu se dostavi popunjen obrazac sa prošle procedure imenovanja predsjedavajućeg Vijeća ministara kao i Zapisnik sa 2. sjednice Komisije za pripremu izbora Vijeća ministara, na kojoj su postavljana pitanja predsjedavajućem Nikoli Špiriću, jer je ova sjednica hitno sazvana. Zahtjevu Zlatka Lagumdžije se pridružilo još pet članova Komisije. Zlatko Lagumdžija je takođe istakao da su predstavnici medija trebali biti obaviješteni o održavanju sjednice, na šta je Halid Genjac odgovorio da su mediji obaviješteni što je potvrdio prisutni novinar iz ONASA-e.

Nakon uvida u pristigle materijale, provedene rasprave članovi Komisije su počeli sa postavljanjem pitanja predsjedavajućem Vijeća ministara BiH **Nikoli Špiriću.**

Sa postavljanjem pitanja je počeo član Komisije Hadži Jovan Mitrović. Njegovo pitanje je šta se to promijenilo u odnosu na one razloge zbog čega je podnio ostavku, pa da sada ponovo prihvati kandidaturu?

Sljedeći je pitanje postavio član Komisije Rifat Dolić, koji je pitao predsjedavajućeg Vijeća ministara BiH, šta se to promijenilo u odnosu na one razloge zbog čega je podnio ostavku te da li će obaviti zadatke koji je pred Vijećem ministara BiH postavljeni potpisivanjem Sporazuma o stabilizaciji i pridruživanju.

Član Komisije Mirko Okolić postavio je svoje pitanje koje se odnosilo na to da li će predsjedavajući Vijeća ministara tražiti od lidera političkih stranaka da dostave samo jedno ili bar po dva imena prijedloga kandidata za ministre u Vijeću ministara?

Sljedeće pitanje postavljao je član Komisije Sefer Halilović koji je pitao predsjedavajućeg Vijeća ministara BiH zašto rijetko ili gotovo nikad ne prisustvuje sjednicama Parlamentarne skupštine BiH kao i to zašto ne osigura da makar ministri ili zamjenici budu prisutni na sjednicama. Takođe je postavio pitanje zašto nije obavijestio Parlamentarnu skupštinu BiH da je zaobilažen u procesu odlučivanja.

Pitanje predsjedavajućeg Komisije Halida Genjca je bilo zašto je predsjedavajući Vijeća ministara BiH odlučio da na sjednicama Vijeća ministara ne mogu prisustvovati zamjenici ministara, te zašto na dnevni red sjednica Vijeća ministara BiH ne stavlja sve materijale koji su pristigli i spremni. Sljedeće pitanje je bilo koliko će vremena provoditi u svom Kabinetu u Sarajevu, jer su bile upućene određene pritužbe da rijetko boravi u istom. Takođe je postavio pitanje koje se odnosilo na to da li ima namjeru (ukoliko već nije) imenovati posebnog savjetnika za poljoprivredu kako bi se rješavala nagomilana pitanja iz poljoprivrede, te šta će učiniti da se ubrza preseljenje Vijeća ministara u zgradu koja je obnovljena.

Zatim je član Komisije Zlatko Lagumdžija postavio nekoliko pitanja predsjedavajućeg Vijeća ministara BiH:

- a) Kada bi imao mogućnost da bira Kabinet, da li bi izabrao iste ljude kada bi dobio još neka imena uz dosadašnja?
- b) Zašto nije izdržao da se ojača uloga predsjedavajućeg Vijeća ministara BiH?
- c) Šta je to u autentičnom tumačenju Zakona o izmjenama i dopunama Zakona o Vijeću ministara od čega je Visoki predstavnik odstupio od onoga što je uradio?
- d) Da li su mjesečna primanja predsjedavajućeg Vijeća ministara 2.900,00 KM bez paušala i naknade za odvojeni život?
- e) Koliko je ispunio od onoga što je obećao prije godinu dana?
- f) Da li sada ima neki novi politički dogovor ili se referira na isti od 3.1.2007. godine, odnosno da li ima neki kontinuitet tog programa koji je dat ili ima nešto novo?
- g) Da li će ustrajati u tome da Vijeće ministara insistira na tome da se uloga OHR-a ukine sa svojim Banskim ovlaštenjima?
- h) Da li će predložiti da se zakon Visokog predstavnika usvoji u Parlamentarnoj skupštini Bosne i Hercegovine?

Na kraju je član Komisije Jerko Ivanković Lijanović pitao predsjedavajućeg Vijeća ministara BiH da li će Vijeće ministara koristiti mogućnosti koje daje član 23. bis Sporazuma CEFT-a, obzirom da u BiH imamo značajne štetne posljedice zbog primjene ovog Sporazuma, a Entiteti nisu u stanju značajnije poticati poljoprivrednu proizvodnju.

Član Komisije Branko Dokić nije postavljao pitanja nego se osvrnuo na pitanje Mirka Okolića i rekao da treba razgovarati sa liderima stranaka koje čine skupštinsku većinu i predložiti im da predlože dva imena za ministre u Vijeću ministara BiH.

Član Komisije Azra Alajbegović takođe nije postavljala pitanja nego je samo skrenula pažnju na to da je neprijatno iznenađena da Vijeće ministara ima takav odnos prema Parlamentarnoj skupštini BiH zbog svog neprisustvovanja sjednicama Parlamentarne skupštine BiH. Takođe je naglasila da smatra kako zamjenici ministara treba da budu uvijek prisutni sjednicama Vijeća ministara.

Pitanja nije postavljao ni član Komisije Vinko Zorić, nego je samo istakao da se pridružuje Mirku Okoliću i smatra da Komisija treba dati podršku predsjedavajućem Nikoli Špiriću, da od lidera stranaka traži više kandidata za pozicije ministara.

I/1. Nakon što su iscrpljena sva pitanja, Komisija je većinom glasova, sa sedam glasova "za", dva glasa "protiv" i tri "uzdržana", utvrdilo da **Nikola Špirić** ispunjava sve uslove propisane Zakonom o Vijeću ministara BiH i Poslovníkom Predstavničkog doma Parlamentarne skupštine BiH za imenovanje na funkciju predsjedavajućeg Vijeća ministara BiH.

Protiv su glasali članovi Komisije Zlatko Lagumdžija i Sefer Halilović.

Zlatko Lagumdžija je, obrazlažući razloge glasanja protiv istakao da ni na jedno postavljeno pitanje nije dobio odgovarajući odgovor, dodajući da je tako bilo i prilikom prvog izjašnjavanja prije godinu dana, ali da se njegovi razlozi nisu našli u Mišljenju Komisije niti u Zapisniku.

Član Komisije Sefer Halilović je obrazložio da je glasao protiv jer nije zadovoljan odgovorima koje je dobio na postavljena pitanja i što, po njemu, predsjedavajući nije dobro vodio Vijeće ministara u prethodnom periodu i što je podnošenjem ostavke, nakon mjera Visokog predstavnika, zemlju doveo u ozbiljnu političku krizu.

I/2. Komisija je preporučila Preedstavničkom domu Parlamentarne skupštine Bosne i Hercegovine da potvrdi imenovanje **Nikole Špirića** za predsjedavajućeg Vijeća ministara Bosne i Hercegovine.

I/3. Komisija je za izvjestioca na sjednici Predstavničkog doma imenovala predsjedavajućeg Komisije Halida Genjca.

Ad. 3. Tekuća pitanja.

Kako nije bilo drugih pitanja predsjedavajući je u 12,00 sati zaključio sjednicu.

***Napomena:** Sastavni dio ovog Zapisnika je i neautorizovani transkript koji sačinjava Zajednička služba PS BiH.*

SEKRETAR KOMISIJE
Milan Zjajić

PREDSJEDAVAJUĆI KOMISIJE
Halid Genjac